

求恕齋  
叢書

雪橋詩話三集

八

雪橋詩話三集卷第八

遼陽楊鍾羲撰集

吳興劉承幹參校

阮唐山聞吳二南司寇訃云東山物望仰雲亭目斷齊  
煙九點青冊府待修疏傳禮泰階驚落老人星東門祖  
帳成前度西署衣香記舊型留得御屏圖像在誅詞誰  
擅子山銘二南名紹詩爲克庵少參孫雍正閒由諸生  
保舉分刑部起曹屬迄卿貳諸子更迭爲刑官與子壇  
相代佐司寇搢紳以爲榮慈寧萬壽列香山九老圖形  
禁中甲午以老疾引年丙申卒諡恭定壇累官江蘇巡

撫兄垣累官湖北巡撫子苾閣學壇曾孫也

李侍郎友棠爲穆堂閣學孫阿文勤乙丑所取士乾隆  
丙申以王錫侯字貫忤逆之書作詩讚美落職乙亥官  
給事中時巡視臺灣有賞番圖題者甚夥秦西墩詩胡  
牀高踞繡衣尊賞徧生番與熟番貓女仙郎齊拜舞都  
都爭獻小黃門紅毛樓外洋更準白玉山前海吼遲三  
十三區五十澳一時齊唱賞番詩

漢軍趙雲章大令嘉程以庚寅舉人官閩中者三十年  
操守廉潔不媚上不徇情吳枚庵嘗稱爲疆項令有純  
齋詩集句如情深言愈少道遠去難延天遣微涼作秋

氣燈回半夢照山城多清適之作

吾鄉李中丞瀚起家牧令早著循名官江右布政使時  
奏停編審造冊護撫數年頗有遺愛乙未授雲南巡撫  
旋卒管緘若挽詩有精心甌牘無留案鏡面罍金不上  
堂之句其送李雲巖大司馬賜告還黔云精勤吏事陶  
公巖風厲官方晏子裘皆乾隆中疆吏有清德者雲巖  
起于流外精吏事知秦州不五月報結四百餘案金川  
之役駐章谷總理南路軍糧者五年守禦僧格桑奮短  
刀白梃禽獲伏賊阿文成欲試其才以鑄礮缺炭檄令  
營辦知大營前路山木甚盛自往營度先令環伐大樹

札木城設卡衛乃掘地爲大窯數十伐近樹而薪焉身  
自留督不旬月炭足供鑄而後返命丁未自江督移節  
四川時論以爲义手上車不取藥籠有趙都督廉介之  
風四川自軍興後倉庫虧挪殆徧潔已率屬休養而調  
劑之兩年之間前缺盡復其奮身簿尉累積階勳非偶  
然也

虞山詩派錢東澗主才馮定遠主法王柳南序許惠時  
詩有云傑魁之才肆而好盡則學錢而失之輕俊之士  
巧而近纖則學馮而失之沈文慙序柳南詩謂窺其意  
殆欲以雋永超詣化學兩家者之不足毛寶之上舍琛

爲汲古閣子晉後人少游柳南之門詩才俊偉在揚州  
作紅橋詩有鐘聲不醒繁華夢夜夜紅梅度玉簫之句  
客廣南最久垂老旋吳長沙春興云春到潭州不是春  
春寒如水雨如塵故宮賸有埋香土舊井今非賦鵬人  
不信風波隨處有斷無櫻筍及時新愁心寄與江南月  
照我天涯鬢似銀無花無酒一春殘去更飄零住亦難  
屈宋至今文藻盡瀟湘且作畫圖看突黔元免因人熱  
裘敝誰禁徹骨寒猶有故交憐寂寞肯遺書札勸加餐  
風致雅近唐賢族人蔗坪上舍晉昭題畫菊云空齋何  
患有催租閒把吟情託畫圖一別晚香嗟隔歲捲簾看

我更清癯亦柳南詩派也寶之從子子干布衣俊亦工  
詩畫

和簡勤以辛酉七月廿三日生星家言有十萬里驛馬  
其自序太庵詩鈔謂乾隆癸巳由農曹督餉入蜀壬寅  
出居庸關過宣化駐大洋河口張城監稅丙午出守安  
徽之太平移潁川觀察廬鳳戊申入覲遷蜀臬庚戌游  
蜀藩修覲灤陽冬調秦中癸丑入爲閣學出駐烏斯藏  
經邛黎雅建諸州出魚通大渡泛鴉隴金沙瀾滄穆魯  
諸南徐江越昌都瓦合丹達魯工諸大雪山抵前藏布  
達拉卽古邏沙城巡後藏扎什倫布卽古日喀孜城西

南巡第哩浪古濟隴聶拉諸外番邊境嘉慶辛酉還朝  
擢司農未久出撫安徽改山左壬戌以事落職戍安西  
復有烏魯木齊之役由山西渡黃河出潼關過長安皋  
蘭涉涇渭黑河弱水出酒泉玉門越瀚海龍堆伊州塗  
次命赴葉爾羌辦事癸亥春采玉彌爾岱山遷喀什噶  
爾參贊大臣甲子西北巡蔥嶺布魯特部卽古大小勃  
律丙寅召還入玉門過甘州抵涼州授烏魯木齊都統  
復出嘉峪關北越天山經巴里坤古城駐輪臺卽車師  
北庭也戊辰西巡瑪納斯古陽關至伊江雅爾諸界東  
巡渠犂城蒲類海山南伊吾廬土爾番城卽車師南庭



也故其自述詩有譎水窮三榦奇山越五經之句江河  
中榦西南徼外南榦祁連山北榦也先生好談易詩  
皈依蘇黃藻麗通脫少壯時能飲酒尙氣節晚年深味  
禪悅斗室之內茶甌梵夾而已唐古特字甲噶爾字廓  
爾喀字厄訥特克字帕兒西字合之蒙古字重譯六書  
太庵木鹿寺經園詩華夏龍蛇外天西備六書羗戎刊  
木鹿儒墨辨蟲魚寺建青鴛古經馱白馬初何如蒼頡  
字傳到梵王居

和太庵洗箔詩當年黠虜逞妖氛眾志堅城義薄雲欲  
訪黑河三捷處逢人大樹指將軍洗箔在葉爾羗城東

七十里兆文襄被圍於此掘得米窖士卒堅壁以守逆  
酋施放鳥鎗悉中大樹得鉛丸數萬後援軍掩至內外  
夾攻賊眾大潰 御製黑水行云喀喇烏蘇者唐言黑  
水同去年我軍薄狃穴强弩之末難稱雄築壘黑水待  
圍解詎人力也天旻幪明瑞馳驛踰月到面詢其故悚  
予衷蜂蟻張甄數無萬三千餘人守從容窖米濟軍軍  
氣壯奚宵麥麩山鞠翦引水灌我我預備反資眾飲用  
益豐銃不中人中營樹何至析骸薪材充著木銃鐵獲  
萬億翻以擊賊賊計窮先是營內所穿井圍將解乃督  
其中聞言爲之悵諸臣實鞠躬既復爲之感天眷信深

崇敬讀 皇祖實錄語所載曾聞我 太宗時明四總  
兵來戰正值大霧彌野敵施火礮樹皆燬都統艾塔  
往視攻回奏敵礮止傷樹我兵曾無傷矢弓匪今伊昔  
蒙帝佑覲揚前烈勵子冲詎人力也天旻曠大清寰海  
欽皇風

華亭王鼎條山夙爲沈壻士全謝山所賞識西莊蘭泉  
皆同輩乾隆庚子年六十始舉於鄉詩曰蘭綺堂集謁  
袁海叟墓云一代遺才出處難感懷殘碣夕陽閒魚龍  
有地潛東海猿鶴何人誚北山老鐵千秋知已在白燕  
爲鐵崖青邱幾輩故園還公獨以見蘿龕風節期誰伴  
幾免禍

明季狷庵先生展謁能生壯士顏詩筆固自雋雅  
亦曾邂逅于此

南唐王齊翰勘書挑耳圖曾人宣和內府明時先在安  
桂坡吳文定所轉入嚴氏國初歸耿會侯有千山耿信  
公諸印記信公名昭忠號在良平南嗣王繼茂次子賜  
昏多羅縣主順治甲午入侍授一等子康熙丙寅卒諡  
勤僖者也弟聚忠亦尙公主爲額駙諡愨敏子嘉祚字  
會侯號漱六主人爲大收藏家每以重貲購名蹟朱竹  
垞跋宋漫堂所藏董北苑萬木奇峰圖卽會侯家物挑  
耳圖卷後歸詒晉齋乾隆乙酉填倉日皇五子筠亭題  
云挑耳圖工妙難擬斐然古色霜縑裏底須眞贗互雌

黃睿思寶墨宣和璽天籟無聲萬竅空座上誰歎獨傾  
耳七尺屏風圍遠山一卷素書開棊几那將搔背倩仙  
姑定知斲鼻煩郢士東坡禪悅雜詼諧重聽虛衷霍然  
已君不聞儻忽七日經營渾沌死社酒治龔真可鄙乙  
酉仲春皇四子題云畫圖真偽誰能辨挑耳流傳供目  
玩兩蘇跋語重坡公校以志林訛且半戲謔元知屬晉  
卿描摹任遣充齊翰命名遑論是耶非標題頓自宣和  
換勘書貴明卽貴聰鬪蟻應隨掃葉散兜元國裏憶神  
游石渠天祿分明現皇六子題云注目屏耳謀根塵料  
能斷何事百城閒蟻度如牛戰要洗萬古龔一朝得泮

免癢處心自知嗒然坐清晏讀書觸遐思肖物有妙腕  
添毫豈易工還擬詢齊翰又有漱芳澹園二首他若觀  
文恭謝東墅張履安金海住盧檠齋劉圃三汪持齋李  
文園汪曉園皆書房侍從也前有大安庚午中秋洄山  
道人史公奕季宏題云挑耳圖吾鄉李叔夏先生所藏  
物叔夏宋名卿清臣之後清苦寡合其家書畫甚多平  
生靳不示人死未久爲不肖子孫所鬻今觀之不覺歎  
惋彌日乃知三變之子何代無之云云是卷嘗於陶齋  
座上見之張米庵清河書畫筋李竹朋書畫鑑影所載  
相合檠齋詩卷軸縱橫斐几淨山水障子開屏風直伸

兩膝脚不韞右手剔耳如發蒙又云我有校書圖一幅  
平生歲月丹鉛中盧固校勘專家也

朱小岑過梁山二絕句云放棹梁山灤口經黃雲二麥  
布郊垆不知誰踵荆舒議瀦水屯田相地形太行脰脊  
連河朔青犢萑苻嘯聚多賴有弁陽傳稗乘何人藝語  
信施羅自序謂梁山灤在東平陽穀閒灤水已涸通志  
謂宋江等曾保此者殊無所據按通鑑稱淮南盜宋江  
掠京東諸郡注謂江起爲盜以三十六人橫行河朔轉  
掠十郡雖未明言其巢穴其起於河朔熾於淮南甚明  
故稱淮南盜及覽癸辛雜識載龔聖與三十六人贊有

敢離太行語然後知江等常據太行故能橫行河朔也

史載宋江等三十六人仇實父水滸圖所繪一百八人蓋本之小說家

朱小岑句窗近昏時妨細字樹當溫處集么禽

小岑分宜詩云一角孤城長薜蘿行人指斥相嵩多妻  
賢勝載亡爲幸兒孽同京老愈訛午夜青青詞方繕進四  
郊戎馬任經過東鄉抵死推前輩才不才如後世何能  
探神龍嗜欲存屈伸可擾是蠖蝓時君護短威羣下宰  
職乘機侮至尊始信逢干非俊物誰言楊沈是冤魂華  
亭也自工摩揣款段何由出禁門同時作者惜抱而外  
罕見此種李松甫秋曹序九芝堂集謂小岑狷性狹中



冷面隔俗不樂進取以布衣終身其間居感事云春來  
日日鳥聲亂嗜睡真成無眼禪開了櫻桃飛了絮幾人  
不負曉鶯天天上鳥飛有底忙才過細柳又扶桑可憐  
夸父追何益依舊朝朝到苑牆侈說尊空北海憂更無  
車轄次公投卅年寂寂都堪笑幸免比鄰目鬧侯閉戶  
寧分雨舊新頻來瓦雀號佳賓門前縱設漫天網不是  
尋常逐熱人介特自立徐孺子梁伯鸞之概時於言外  
見之

長洲張南陔明經思孝酷嗜藏書精鈔祕笈數百種終  
日校讐丹鉛不去手顧千里嘗師事之有白華詩鈔

瑚錫哈哩文愼公伯麟字玉亭號梅坪由辛卯繙譯舉  
人筆帖式擢贊善麻官卿貳嘉慶甲子由山西巡撫授  
雲貴總督時緬僧張輔國據南興蠶食耿馬孟連猛猛  
三土司地掠及緬寧爲邊患者十餘年邊民高羅衣亦  
乘閒劫掠王申與巡撫定策未及三月勦平之以功加  
官銜晉拜揆司戊寅復殲除其餘黨邊境肅清文愼自  
撰紀事詩有三月欃槍雖速掃十年蹂躪不勝悲之句  
宋芷灣書後五首云聖人弦威弧吹萬綏羣方中天懸  
日月隙牖承明光雲南古靡莫開闢非洪荒夷種雖蠢  
雜履戴同編氓江外在何許澧社瘴癘鄉且復禦魍魅

誰復苛犬羊如何忽弄兵初猶爭酒漿夜郎竟自大嗟

哉真豺狼

其一

爾脅從者誰不問耶與孃爾踏藉者誰不

問弟與兄得據卽帶礪以殺爲糗糧天子聞曰吁其又

可弗創汝總督臣麟七十鬚眉蒼功大心轉小身久麻

戎行滋蔓不可圖用人惟厥長臣麟拜稽首箭卒三千

強五旬而舉之

天聲威遠揚

其二

小臣曲靖守曲靖鄰

夷疆憶點曲靖兵五百臨安行城門一杯酒告之勇知

方少長咸有禮竊喜用可良所過同衽席師律何堂堂

三月初八日夜半紅旗揚關心問郡兵一一無所傷益

歎丈人吉師貞非否臧韓范庶不遠廣牧兼所長

其三有

甲亦已洗有弓亦已藏  
天河倒雨水芒角收欃槍  
我兵朝歸來少婦凝新妝  
我將晝歸來轅門旗央央  
去日桃始華歸日梅乍黃  
殺賊豈不苦所喜不缺斨  
如何斨不缺未轉千里糧  
誰知元老心兩月滿頭霜  
其四嗟爾高羅衣羅衣醜  
且長嗟爾高借沙借沙五尺強  
江邊一瓢水所飲皆天漿  
高高觀音山社樹陰且涼  
雌夷花滿頭繡帶紅  
襦裳爾何不自樂頸血污我槍  
纍纍臨安市白日屠豬羊  
豬羊尙可食爾肉不足嘗  
彼高者蒼蒼彼廣者洋洋  
請讀紀事詩以保爾夷生  
有韓雅之遺意焉文愼以庚辰  
內召道光紀元遂正揆席癸未與萬壽山玉瀾

堂十五老臣之宴甲申八月卒有退思齋詩鈔任城孫  
寄圃相國爲之序吳巢松詩宰相清如此昇平事可知  
苦尋詩句好渾忘節旄持其溫恭直諒當時無不服其  
端雅也

江陰繆霽堂職方以寫像名兒時乘塾師出竊紙筆隨  
所見人默圖之有不似百方塗改廢其所課旣長稍以  
試之儕俗昆友閒游武林會尙書福長安奉使過浙挾  
與俱北 召見於奉三無私殿命寫 御容以短視準  
用眼鏡拜文綺之賜甲辰南巡以諸生獻詩三十首紀  
盛遂與召試賜舉人官中書命更定紫光閣後五十功

臣畫像戊申春臺灣平復繪功臣像輦下名此技者皆  
爲之緹賞賚視供奉大臣有差公卿爭購其迹或至一  
二年不能得其紀恩詩序有云比懷硯之米芾無此殊  
恩卽題卷之鄭虔遜茲奇遇王惕甫嘗爲作小傳

安邑宋野柏少卿在詩服膺曹月川之學子半塘通判  
鑒傳潛邨之學著有周易見尙書攷辨芝山助教葆潭  
半塘子也乙巳赴隰州學博任翁正三送以詩云京華  
十載客司鐸萬山中蒲子傳堯蹟桑津考晉宮雪融泉  
水合春泐澗花紅待爾研經切來披杏苑風理學兼經  
義趨庭早得師獨推書畫藝未盡友朋規衣袖干峰挹

家園萬里隨不徒過古絳爲我別苔碑江子屏稱芝山  
淹通工詩古文愛金石書畫皆入能品能傳其家學者  
也

豐潤鄭秋浦激在御史臺疏請停貢金玉語頗戆直每  
退直手椒山一編泊如也後以吏事罷議阿文成諳勸  
捐復秋浦竟歸田管緘若次其留別原韻云高岡噦鳴  
鳳屈指桐幾花在官每上書偉議留史家如何去不返  
三復邱中麻意深惜之阮唐山爲題拈鬚獨立圖云君  
昔登柏臺風節震京洛寢食椒山集意態何恬泊君昨  
田閒去汀洲自采若初衣未染紅青鞵笑更著憶從結

契初廿載倏如昨  
驄馬陟烏臺  
鳴鳳翥鸞閣  
意氣水乳融襟懷  
冰雪嚼菘頰  
往還紙窗安筆格  
聚散亦何常  
出處心無忤  
比聞課士餘  
寫圖破寂寞  
榆柳樹干株  
澄湖波一勺  
徐步白板橋  
袷衫謝塵絡  
臨流日詠詩  
拈鬚自商榷  
獨立向蒼茫  
斯人稱邱壑  
韋慎旃詩半畝  
桑田屋數楹  
一池秋水夕  
陽明不知  
獨立蒼茫處  
撚斷吟髭  
有幾莖  
歸去唯於泉石宜  
襟懷冰雪許  
誰知白蓮花畔  
香偏遠  
正是懷人得句時  
亦爲秋浦題圖作也

嶺表詩人馮黎並稱  
桂文敏爲伯求門人  
爲序小羅浮草堂集  
謂先生之詩高者入  
天心穿月脇幽窈奇  
崛不



可爲狀次者直抒胸臆寧蓬首羸服而恥爲苟飾星月  
之光不避雲霧江海之流不憎泥沙可謂能道所長吾  
獨愛誦其餅內一首謂有深婉之致詩云餅內已無紅  
芍藥水邊時見白薔薇獨尋可信春無迹欲折猶嫌刺  
著衣綠蟻樽空餘舊酒黃鸝日暮但深飛芳園亦有閒  
庭院何事東風寂不歸

乾隆己亥翁覃溪典試江南途中次謝金圃魚字韻詩  
云先人每墮名場淚爾我曾爲點額魚今夕捫心對江  
水幾多寒士在蓬廬恭讀 純廟聖製詩注魚以首夏  
交合牝牡相逐嚙腮以孳其尾故尸子有暴腮龍門之

說蓋其時正當首夏成匹之時耳上則爲龍已屬荒誕  
後人遂訓爲曝以比失意不中者更失之遠矣可破相  
傳之誤翁詩則尙仍舊說也見聖製詩者如箬溪鮮魚  
名出口外諸溪澗中狀似鱸而味鮮美過之國語謂之  
箬溪鮮蒙古語謂之集伯格然尙不如吉林之赭鱸也  
又云雁魚產盛京身圓無鱗尾多三歧一名霸魚又偏  
口魚背青腹白形匾而薄匾行水中海中魚惟偏口先  
至雁魚次之故諺云先偏後雁又云赭鱸出黑龍江歲  
貢百尾九月棲江濱捕而畜之亦曰遮鱸又云蜚綠魚  
寧古塔黑龍江皆有之似鱸色黑味美不腥亦自來所

未詳盛京又出羊魚身圓色黃尾銳能刺人相傳羊魚胎生魚聞雷輒羣入大魚之腹土人往往於大羊魚腹中得眾小魚黑龍江寧古塔諸江河有達發哈魚秋八月自海送水入江充積甚厚土人竟有履魚背而渡者腹中子大如玉蜀黍邊地人取魚炙乾積之如糧皆可爲多識之助

鄞范氏天一閣書進呈乙覽有蒙 御題者閣前有方池半畝初名寶書閣因得揭文安所書天一池拓本改名天一取生水厭火之義架旁多置英石云可辟淫同邑盧氏有抱經樓藏書亦頗富錢竹初題盧東溟書船

圖云柳色煙光澹沱春蒲編遙映水鱗鱗扁舟莫道無  
多客不載今人載古人岑樓方許抱經眠又泛江虹貫  
月船應笑君家玉川子長須赤腳屋三椽月船居士盧  
鎬嘗從謝山游每歲假藏書鈔本至數百冊以歸盡讀  
之樓中藏地志幾六百種同治閒修鄞志以補選舉人  
物傳頗多董覺齋詩劫後猶存萬冊書浙河遺籍此樓  
孤秦宮幸脫阿房火粵海如還合浦珠蓋嘗爲楊氏所  
得仍還樓主也近日其子孫不能守仍復散入人間矣  
許醉石上舍爲子遜大令文孫白蓮句云空漾一池月  
微聞十里香螢云向月明珠空有淚逢時腐草亦生輝

猶有竹素遺矩

管緘若輓英甫中丞穆和蘭詩云頗聞天怒霽日望逐  
臣還惡問星郵達知音雪涕潛寬柔羣謗懦廉節世疑  
慳飛夢迎丹旄時時越玉關中丞自皖撫移節中州節  
院西偏前使舊時歌舞處也畢秋帆撫汴多蓄聲伎自  
排長生殿劇嚴冬友至謂聽之已厭中丞履任後從未  
開讌綺疏頽落畫檻傾欹惟爛漫戎葵爭雄蒿艾而已  
緘若嘗佐節幕有題壁詩云幕府依然早晚衙中丞清  
節似山家錦堂閒殺笙歌地開徧戎葵一院花王子冬  
臧若自汴赴京留別云二年賓席至如歸坦直開懷兩

不違切奏互同私藝改枯禪常共佛鐙依簡書期到何  
由卻衣袂情深未忍揮強命臨歧一言贈佩閒珍重或  
宜韋甲寅以劉之協在扶溝脫逸事落職發烏魯木齊  
緘若詩一夫脫死須臾事八座投荒萬里閒嫁禍鄰言  
何太險收威天怒已徐還重看魏尙持星節不使班超  
老玉關徧十三州思去後豈徒舊客慘離顏其持躬之  
廉儉列鎮之去思惜不能見容於盛世也

法時帆題金粟道人像云玉山亭館今何有玉山風流  
炙人口可憐金粟託前身隱君之意不在酒少年結客  
姑蘇城三十六橋秋月明樵青收網榜歌唱瓊娘擅袖

親調箏一時賓客詩中虎元鎮廉夫及伯雨玉鸞珍重  
配鐵龍水仙舟裏吟詩苦牀頭摘阮復彈棋贏得絲囊  
酒在卮烽火隔江僅百里平生歡笑倏成悲武略將軍  
歸海上彩衣金印天人樣老翁醉詠秋堂花夜闌秉燭  
餘悲壯壙銘像贊寫高懷藉草憑山便骨埋遷徙臨濠  
死亦好清魂如傍可詩齋曠世增悽文待詔生綃曲盡  
添豪妙碧梧翠竹半荒蕪桐帽欒鞵猶冷峭我家舊住  
西涯西十頃芙蓉三里谿閒鷗野鷺參差見畫楹詩瓢  
次第攜幽姿摹出龕生色想見當年樽盃側吹笙擗笛  
奚足多惟有豪情壓不得野雲爲我圖耕漁峩冠儼服

清且臞異代相逢應一笑天地何處非遠廬詩龕主盟  
風雅所藏海內詩至七百家選所見集亦玉山草堂之  
亞也

梧門藏有順治壬辰乙未戊戌三科進士履歷葉仁甫  
作長歌題其後略云名經千佛羅祕冊三科蕊榜羣材  
收順治壬辰越戊戌里居甲第詳部州英雄入彀千二  
百一一標注某水邱出何經房系何氏細字件繫如蠅  
頭護兒之兒蘇瓌子亦有家學承箕裘簡長盈尺博四  
寸麻沙版樣黎棗收高昇書肆志新刻紅箋色黯猶風  
流面葉用紅紙憶昔 先皇劫洪業威憺薄海來共球武功



既輝文治盛鶴書鳳詔馳遐陬登揚往往得奇傑外爲

方召中伊周卽如此編志姓氏范

忠貞湯文正

偉望誰與侔

其他公輔盡碩器黃岡

宗伯王公孝感熊公

推殊尤漁洋老

人況詞伯後先韓鄂葩華抽西樵壬辰中式乙未補殿  
試漁洋乙未中式戊戌殿試也

時帆與謝薌泉楊蓉裳孫淵如李松雲劉松嵐唐陶山  
俱癸酉生陶山次韻伍堯梧門庶子見贈之作云久宦  
嬰沈痼常懷故山廬如何隨計帳似賈求贏餘且喜入  
京華或可償詩逋步履小西涯老樹何蕭疏相見各言  
疾一笑還乘獻館閣與州郡荏苒皆白鬚清濁雖有異

同爲勞其軀念我四三友生年癸酉俱强者弱一个謂  
籀泉況強不若渠所須惟藥物何必氏倉庾問余何所病  
司空城旦書治河與轉漕無策堪發摠陳力合知止蕭  
散全吾樗公亦謝令僕欲跨襄陽驢酬對古名流孤龕  
興不孤時帆挂朝籍三十餘年屢起屢蹶兩試翰詹並  
以下考左遷亦未嘗與衡文之役嘉慶丁卯以纂修宮  
史篇葉譌舛由講學降庶子因病乞休甲戌卒年六十  
二嘯亭主人謂己未春上疏請旗人屯田塞外降官編  
修因引疾去官以終誤矣子一山舍人後先生二年卒  
黃霽青本其遜學齋自序詮次爲小傳一通於其厓官

編校著述爲較詳羅兩峰嘗爲畫小西涯十二詠詩意  
十二詠者積水潭滙通祠十刹海淨業湖李公橋松樹  
街慈因禪院蝦菜亭慧果寺豐泰庵清水橋詩龕也友  
人爲刻文於揚州刻詩於杭州皆止其以版送京弗願  
廣布有朋舊及見錄六十四卷體例略仿明詩綜秦小  
峴爲作序其朋舊贈答題詠之作別爲聲聞集仿冒巢  
民同人集例也又有備忘錄一書自謂讀書記性最下  
或鈔自祕集或聆諸師友不加辨正其詩話傳於南中  
實未定之稿自謂三十餘年未離几案筆墨遂冗沓泛  
濫非敢與古人爭長也伊組似歎逝詩祭酒蒙古秀生

憐死相捐翻因官不達校盡華林編詩龕積水潭陳迹  
難具論傳聞絳灌逝頗用賈生言爲足概其生平

董東山秋山霽色圖自題仿檀園居士筆意爲梧門祭  
酒舊藏文恪子柘林相國敬題二絕梧門詩云文恪直  
南齋前後三十春南昌彭文勤公昔手錄甄述公工六  
法天授非由人隨手水墨灑古黛層層皴清光浩無際  
動與造化鄰小幅仿檀園橐筆立紫宸生氣遠溢出誰  
復窮厓垠是年下馬陵面目匡廬真漫設青藍喻豈沈  
香光塵先祖手澤貽何啻連城珍南齋盛題識墨色爭  
鮮新富春今相公此紙當傳薪凡爲我子孫視此香火

因謂公子桂馨辛未會試卷已擯棄文恭特爲拔出也

吾鄉先達如德定圃

有潤亭印

玉閨風

諶曰觀於石經堂

那繹堂英

煦齋桂香束皆有題識

戒臺圖裕軒曹慕堂二先生祠楹門旣爲作記嘉慶庚

申游慧聚寺詩並書圖冊中云行過萬松更無路清磬

一聲風殿住病衲指言二老祠游人憇息爭題詩拂苔

先認碣頭字二老當年舊同事鷗鷺無猜共起眠梅花

明月三生緣滄江轉徙青山裂惟有此心能不滅石龕

炯炯光明鐙靈旗翠羽神依憑詩成欲就二老問俗筆

如何出遺韻回頭雙鶴雲中翔曳杖我自尋長廊是圖

凡四繪中惟李畏吾詩不多見詩云三十年深事已灰  
西郊躡履步荒臺畫中忽結松雲侶空際遙傳猿鶴哀  
風節共應山比峻悟門真與佛同開洗心梵宇頻招引  
何日皈依二老來彼時曹定軒以裕軒學士從獵泛舟  
二圖並藏祠中今不知散落何所

乾隆癸卯孫寄圃相國以檢討典試廣西解元岑照田  
州土官之子饒於財覓鎗手代作文字得中式寄圃與  
正考官吳蓉塘據實參奏時監臨爲孫文毅審明卽正  
法焉其北歸舟次詩敢云珊網無遺寶豈意商山有僞  
芝

汪容甫序吳白庵詩謂其勁氣直達指事類情無復遺  
蘊適如其人泛舟石湖云短短秧鍼綠滿疇水雲渺渺  
似涼秋此閒最是爲農樂赤腳吳娃解飯牛過露筋廟  
云疏磬泠泠和梵音湖雲一片廟門深居人摘罷薑心  
菜自織蘆簾就午陰時見蒼秀九曲里訪稔石翁卽景  
四絕云歸老經營丙舍田深村愛結野人緣訪公九曲  
裏邊去菱葉攔開恰放船三環洞橋高可過矮橋接續  
礙船篷分明橋口風當面轉過溪來是順風岸東西對  
植柔桑苦竹叢叢柳幾行犬吠雞啼是何處石梁鐫字  
認曹莊萬綠蒼蒼去路遮綠蕪盡處港三义黃茅子屋

門臨岸秋老殘叢扁豆花白庵善畫此詩儼然九疊堂  
圖也

一等超勇公海蘭察多拉爾氏以索倫馬甲生禽輝特  
台吉巴雅爾擢侍衛平金川以參贊封超勇侯吳曇繡  
海侯詩海侯黃面兩眼青夜坐帳中觀列星匹馬殺賊  
雙青萍不聞人聲但血腥身輕先卒走躍脛臄龜脫甲  
陣不肩大宛之馬紅絲絳畫雕之弓雪白翎一發雙矢  
力透駟憤深勃怒吻出霆生小不識陰符經家世光耀  
籍索倫叶功成紫光圖厥形畫閒述戰媿足聽今年西  
度隴與涇六月破賊雨晦冥千山飛礮火迸熒巨雷殷



天聲不停手捕蛇蝎申天刑蕃王土司爭獻醮名字聞  
者耳覺馨海侯温温心若冷退然處女含娉婷 天子  
愛惜三丁寧李廣數奇非定評無才受辱灞岸亭此紀  
乾隆四十六年蘇四十三之役也是役力戰受創 高  
宗憫其勞温詔宥慰賊平授其子安祿侍衛石峰堡之  
役賜騎都尉世職林爽文之役晉二等公廓爾喀之役  
晉封一等公五十八年卒謚武莊十五功臣圖像成  
御製贊有勇而有謀侍衛宥公之語熊寶泰紀其軼事  
爲詳

納蘭靜遠軍門西密揚阿初爲左翼鎮調雷瓊鎮宥至

提督工書畫指畫山水雜卉信手而得兼能爲古今體  
詩伊雲林嘗贈以詩云納蘭才子世承恩天遣南荒見  
鳳簫温室樹高思宿衛佛桑花發照軍門泛湖詩好弓  
衣織掃閣風清筆陣煩最喜深秋鯨浪息馬人龍戶趁  
墟繁其弟二首有橫海歸來復幾春閒繙貝葉放衙頻  
之句則又究心淨業也嘗以舊窑器及煙客山水卷寄  
吳曇繡媵以七言古詩曇繡有青霜紫電將軍庫七字  
眞驅介馬來之句至謂其名字衍天潢則係誤用墨香  
居畫識亦著姓覺羅字文暉嘗係沿誤

畫家言畫樹難畫頭欲其紛披而鬆散也其結而不開

者主其人境遇坎壤見吳曇繡題同年毛宿亭遺畫注  
李少鶴王莽詩王莽欺世皆小兒蒙裳戴面相與嬉一  
朝翻毛變虎吻大肆搏噬兒驚唬前呼祖龍後孟德干  
古英雄真莫逆臣斯臣或及臣歆徒爲所玩寧能測四  
十八萬人上書斷送纔須一杜吳豈惟食人爲人食至  
竟愚人空自愚莽雖有舌何足切爲與六經作妖孽莫  
言致亂因井田後來更有青苗法議論正大足以寒干  
古奸雄之膽惟以荆公廁其閒此論未公其蘇王詩云  
鍾山一小艇野服見丞相乾坤數大事祇供一撫掌一  
髯人中龍一老野狐精兩怪相格鬪天地爲震毒

武進錢竹初謂李斯焚書一事足以殺身沙邱之謀始於高而成於斯斯爲丞相故高媿媿勸之斯豔于寵位故不能奪耳不然扶蘇立蒙恬蒙毅爲將秦未可知也秦無李斯亦必得天下秦非李斯不至卽失天下其讀史漢雜詠云功名倉鼠歎神奇學力何曾祭酒師遂遣詩書無偶語但教督責且逢時亡秦實定沙邱策擢相終懷上蔡悲生死都由趙高手盛衰那許熱中知他如詠信陵君云一泣因磨鄴上旗威名豈讓霸王師卻秦終阨函關騎救趙何嫌晉鄙椎兵法自從消病酒博徒無復感深知至今名厠三公子不及夷門守冢時衛青

云出塞勳名傳衛霍起家多自尙衣來騎從何意平陽  
主奴畜終成大將才漸覺任安能戀舊可憐李敢未忘  
猜餘恩也學祁連冢一樣侯封付草萊李廣云下中作  
相數難爭援臂空馳絕代名射虎未能消猛氣持醪誰  
使泣從征威行結髮曾無敵老見封侯自不平一事先  
誅灞陵尉將軍恩怨太分明蕭望之云抱關錄錄志非  
常東海蕭生老自傷經術枉教聯子政忠謀不獨殺京  
房構讒卒就黃門拜就吏空知太傅剛猶有瑯琊稱國  
士彈冠晚歲藉貂璫竹汀詹事序其詩謂昔人言史有  
三長詩亦有四長曰才曰學曰識曰情先生兼詩家之

四長此類庶乎近之

阿文成公軀幹不甚偉而儀表若神論事侃侃無所回互每治大獄甚怒輒曼聲大笑笑則雙眸盡白光睽睽如電見者無不震懼好論史事評隲人物最重名節好讀少陵詩嘗獨坐誦丹青引大食刀歌反復不去口于書嗜米南宮乾隆十三年大金川叛張廣泗用兵無功命大學士訥親視師公以軍機章京從會廣泗與訥不相能公早負偉略語頗輕廣泗其屬吏莊學和聞之潛以告廣泗恚怒欲中公法學和願爲左證乃以漏泄軍情劾公械逮勘治阿文勤聞其至京遣老僕覘公則方

熟寐銀鐙閒還白文勤稍安曰兒器度若此當不至死  
既就廷尉將論斬翼日文勤召對顏頓悴 純廟憫念  
卒赦免之越二十年公乃爲定西將軍平兩金川凱旋  
時學和先爲蜀守謫戍其子投謁告困公款接之以三  
百金資之歸方公爲章京傅文忠極器賞之後賺公驟  
相抗衡不爲之下緬甸之役公以副將軍督造戰艦于  
蠻暮諸路兵多挫損公獨完師以待文忠自猛拱還所  
率精銳兵二萬盡喪僅存二十七騎賊復大集來犯公  
擊敗之力勸文忠乘捷受緬酋降以葳事文忠復心媿  
之還朝乃面論公有旨嚴責令斥去翎頂辦事公云傅

恆罷兵臣實贊成之 皇上以臣無能逮治可也若乃  
令統師去翎頂無以肅觀瞻臣未敢奉詔文忠病劇密  
奏阿某有跋扈狀 純廟特倚仕之嘗謂朕屢欲殺阿  
桂愛其爲國家有用人終不忍也文忠歿公保護其後  
人甚力海武莊隸公部最以勇聞嘗語人曰吾昔從阿  
公行閒所向輒勝者服公盛德也公每欲攻一險籌命  
將先溫言勸獎如不及旋恍以危詞若斧鉞之立加其  
頸者察吾不敢不效死力義形于色然後密授策一出  
戰克期而捷反命公必手卮酒相勞親愛如骨肉至彼  
此流涕甘肅回蘇四十三平念肅州爲西陲門戶其城



隘不足用武乃酌定規模繪圖奏請改繕繼而少司空  
德成往勘更其制小之公聞太息曰後人或以是城爲  
我營將謂我不知地利矣初逆回攻蘭州布政使王廷  
瓚有守禦功和珅以侍郎視師至聞甘省有賑災積弊  
陰索賂二十萬金廷瓚故木強不予珅旣以兵大挫海  
武莊力護得脫無以覆命又積怒廷瓚遂偵得冒賑顛  
末還朝面奏冒賑事之起也以地多偏災請開事例爲  
救荒計委榦屬巡視州縣卽無災必詭言災需賑若干  
准給乃上下分肥果有災卒亦無賑密諭文成查辦公  
以軍興方亟緩其事未幾斷石封堡水道輒以雨阻致

回眾仍得變殊死拒事聞 純廟以每年輒如期告旱  
今乃時雨頻降益知報災之詐趣按其事且時已奏捷  
公不得已斷自乾隆三十九年監糧既停復開爲始付  
總督李侍堯治之後語及此案每蹙額以珅因私憾致  
廷瓚逮斬西市自監司至守令論死者五十六人其論  
戍極邊破家籍產者無算也陳輝祖之以墨敗也將軍  
王進泰攝制府篆因籍陳並及其姍童周兩家產周故  
直督元理公同年友也公至進泰以告公曰梁國治非  
陳兒女戚耶何以不籍之盡釋株連者及庭鞫責陳曰  
日者 上以閩浙總督難其人爲問吾舉汝汝莅任數

遣使饋金饋人稜曾受汝絲毫物否度汝欲以貨取我  
必不能廉潔自持故經年不答一紙冀汝悟而不謂竟  
至此既定讞輝祖求一見母公曰母子相見人情也吾  
何忍阻汝雖然願汝弗見母也汝獲罪已負慙母母老  
與汝訣更何以爲情不如愬而行矣其嚴毅不可干以  
私而又誼篤故舊如此錢竹初與公有舊嘗舉公相勛  
之言云教除害馬斯良吏便到亡羊莫反經縷書遺事  
較孫洪爲尤詳

顧笠舫教授與中表楊蓉裳競秀梁溪畢秋帆謂以顏  
謝擬之楊則鏤金錯采顧乃初日芙蓉也少游貴池代

人撰昭明太子廟碑袁存齋歎爲高手笠舫因作感知  
賦其哭學和弟云萬里陽關道魂歸汝不歸篋留前歲  
字裝返去時衣易斷知緣淺無聊怨夢稀傷心雲外雁  
猶自作行飛身賤依人易家貧奉母難慙余長困頓送  
汝是飢寒旣散寧無聚當悲反自歡誰知臨訣語重復  
寫平安少日聯牀話兒時共被眠有才何不達多病竟  
無年生計嗟吾拙衰門痛汝賢嚴君如定省猶足慰重  
泉一往情深固不徒工藻語蒹塘其令子也學和名數  
愉爲蓉裳妹婿蓉裳官伏羌延主朱圉書院蘇四十三  
之亂率生徒嬰城而守者七晝夜賊退尋卒蓉裳有誄

文甚哀詩曰靄雲草如感秋云月落露華重南鳥巢北  
林浮雲中夜起萬里生秋陰幽居屏營慮庭戶多蕭森  
哀鴻正南翔聲促無遺音荒徑生蓬蒿蟋蟀入戶吟浮  
颺委時卉飄零怨秋深歲寒霜雪多願懷松柏心依人  
遠游故多哀怨叔子敬恂字斐瞻有筠溪詩草季子敷  
憲字傅爰有幽蘭草蓉裳合刻四人詩爲辟疆園遺集  
甬上萬氏得黎洲之傳謝山史學得之萬氏鄞縣蔣樗  
庵孝廉學鏞爲謝山高足其詠史云膏以明白煎歎息  
龔生天惜膏時黜明沕昧徒自保卻聘甘一死殉義豈  
草草膏盡明不熄流光燭天表班生固史才特識恨已

少同時抗節士疏略費搜討合傳附貢禹義例更難曉  
區區因授經無乃見其小未載父老語晦迹譏不早孔  
光正耆壽相較誰醜好沈公笑何公勇退計早定江左  
仗虎臣屢起主兵柄事罷旋乞身隨例奉朝請晚旋婁  
湖宅踪跡益遠屏幼主方縱暴殺人如不勝大臣謀廢  
立密使遣相訂公但謝不預持義良亦正云胡許義恭  
大獄慘窮竟顏柳俱橫屠積尸看疊併從此得主眷步  
步踏危筭諸臣死幾時身亦罹冤橫嗟嗟勇退人暮齒  
陷非命孝寬洵將才一戰摧尉遲楊堅篡遂成智勇何  
誤施士各爲其主助逆尙有辭韋公故元老與堅素等

夷倘諒翟義志宜連灌嬰師古來竊國徒伐榦先披枝  
淮南兵再殲典午旋開基河東屢奔北汴梁刻禪碑九  
錫加隋公茲事五尺知鄴城朝以破周祚夕以移平生  
負威望積效久邊陲晚叩囊底智適供易代資臣節旣  
不終佐命仍見遺功成身遽殞勩力徒爾爲筆挾風霜  
其淵源有所自也同邑董小鈍大令亦鮎埼弟子詩如  
大隱溪寓亭云黃公棲隱處孝子筍輿經流水門前綠  
高峰屋角青求魚尋鐵網洗藥挈銀瓶底事恩恩去山  
雲閣客星語極名雋黃東井定文從蔣檣庵學得謝山  
之傳其息縣渡淮云昔歲涉江河今年溯清濟更於長

淮流尋源得奇詭光山之北息縣南西隔胎簪幾日耳  
并包縱復挾細流不信奔騰已如此我來三月春水急  
元氣漫空雜噓吸直疑鎖脫無支祁鞭起長鯨作人立  
百川要歸海獨者方爲宗奈何安東境并與黃流東邗  
溝倒入江瑟縮如附庸瀆不爲溝同非同豈知流弱源  
反雄嗚呼流弱源反雄平陂豈得長沖融不見汝潁渦  
蔡百流集浮圖千尺洪濤中

李少鶴詩彙治諸家獨師懷抱才雄而氣峭兩牧歸順  
州人童九臯唐夢得兩明經皆從之游奉中晚唐主客  
圖爲厚的九臯名毓靈號碧潭有嶽廬秋思賓山諸集



寄呈李五星云住處四時冰前身何洞僧經年長不出  
五字有誰能看積眾峰雪坐殘孤壁燈寧知萬里外夢  
見骨峻嶒夢得名昌齡字心一有碧川詩草句如山水  
淺深趣因人趣乃投鶴歸一僧飯鐘動萬家秋皆冷峭  
得少鶴之一體九皋弟葆元號介安亦少鶴門人和少  
鶴先生夏日登城西閣作云高閣無暑氣鶴衣披此閒  
坐來將午日吟對始晴山祇許僧堪並尙嫌雲未閒手  
中藤杖在猶憶舊松關於二李可稱具體同里袁子實  
上舍思名從少鶴學詩專師賈長江刻苦幽峭句如礪  
礪空自奇甘死不甘媚易換相看髮難辭欲別杯皆不

作猶人語象州夜泊云碧水光分白鷺洲淺沙蘆畔駐  
扁舟隔林夜半霜風起散入猿聲送客愁亦唐音也馬  
平葉亮工上舍時督師事少鶴執弟子禮孫顧崖因題  
其所居曰鶴巢少鶴謂鶴巢遺識不隨俗轉移誰言越  
無雪耶遂名其集曰越雪周澤棠入羌尋父歸里賦贈  
云路入西羌道思親淚未乾若無相遇處祇覺此生難  
虎境少人過雪峰當夏寒寧知此共返鄉里亦稱歡格  
律正復相類

祝止堂題李石桐詩冊云詩能摹賈島書可亂邢侗石  
桐能書兼工繪事題畫扇贈單太守歸田云釣游幾處

尙依依城郭斜陽春草菲五馬歸來頭似雪青山不改  
故人稀不須重枉使君車記取東皋暮雨斜扇底寫來  
風景似小樓深處是吾家王熙甫侍御嘗有詩云城南  
老桐作畫古恥向世喙覓稱予從來下睨石谷翬力提  
司農金剛杵石桐集中有熙甫考功自都門索畫爲模  
王司農筆云麓臺於爲畫力將時俗矯當時虞山王舉  
世競傳寶先生下視之值不一錢少念子岩穴士學詩  
用此道常恐古人訶不顧俗情惱別我今一載離夢山  
川繞擗毫思其人擬此婁東老自然性情合投贈愜素  
抱獨行古不容沖襟良難保勉旃善所守慎勿學爲好

論畫可通於論人矣

傅文忠征緬時海鹽陳孝治墨儂以緯候占決佐軍幕  
運機端筴暇與孫補山唱酬最歡以勞羸謝病去留別  
從征諸君子云壯懷未了從軍志尊酒空餘話別緣檀  
默齋序其詩比之樊川樊南過貴州作云花裙處處逢  
苗女銅鼓家家祀竹王

史赤崖懷歙縣巴部曹慰祖云晴川歷歷敞柴關玉版  
閒臨翠墨煊記得隔江搖別艣酒痕覆面日銜山其贈  
子藉詩有云近人學隸不識篆若航斷港棄篙艣瓣香  
遠絕嗣者誰昭代精能推鄭籛籛惟誤信剝蝕文強作

離奇折釵股拘牽石墨破古法浪詫良工用心苦君由  
早歲嗜成癖貫月虹光環玉府汪容甫稱其少好刻印  
務窮其學旁及鐘鼎款識秦漢石刻遂工隸書勁險飛  
動有建寧延熹遺意故富家交游或欺給攫奪由是大  
亡其財晚爲人作書自給云

周松靄聞朱石君作佛孝經遂銳意著佛爾雅其十三  
經音略墨守字母剖析微茫令岑溪有善政與山陽劉  
信嘉金壇于烜稱爲三賢岑人立祠奉祀後任李憲高  
爲作碑紀其績禾中王某拓寄松靄松靄作詩有輸與  
他人開質庫荒城贏得幾閒祠之句海昌鍾大源晴初

其門人也詩云飲水彈琴甌有塵萊蕪所得是清貧篋  
中併乏胡威絹寄語長生質庫人解紱歸來樂事全崇  
祠破屋兩依然小民爭識穹碑字一字期公壽一年

吾鄉馮拙圃明府聖世宰鎮洋邑中呼爲老佛顧容堂  
感舊詩仙鳧自北來東南作良吏下車釋罪人笞杖日  
揮淚自云縣官卑牽制上游意但恐負我民日夜忝此  
位乾隆辛丑秋海潮入內地劉河民死亡委屍若山積  
完卯安其巢棺槨掩骼斃飢民僵道旁探望公輿至公  
也慘不歡餽粥爲民食上叩大吏轅大吏憐公志飛章  
達聖君萬戶春温被子是老佛稱羸弱口無異退衙愛

諷詩筆墨與所寄每動憐才心汲引獎善類欲搜凡馬  
空得一千里驥容堂弱冠以詩拔置第一補弟子員也  
渠縣李藝圃給諫丁丑進士爲御史敢言事巡視中城  
劾傅文忠家人樂大醉打金陵樓事擢給事中先是大  
恃文忠勢招徠無賴輩肆行市衢間無敢問者藝圃曰  
傅相以忠謹傳家故能奕禩保大今其家奴游蕩非公  
所能知不可使其風日滋反貽累貴戚乃捕大審實立  
奏遣戍一時公卿雅憚焉李少鶴贈以詩云史中鄭俠  
傳再世是先生膽大輕時忌身存託 聖明學人求疏  
稿遠使問鄉名朝列盡如此西戎不戰平後以諫匿災

事斥還禮部少鶴出都留別云上都冠蓋盛靜睨方了  
了一二獨大星牢落壓蒼曉我幸生識之至死不悔懊  
又二哀詩云尙聞歸蜀日無那隕星何本傳史中具直  
風泉下多其傾倒至矣

珍庵郎中明琦廣眉大口善談諧官秋曹作消夏清談  
紀神仙鬼怪之事窮形盡相可續齊諧先是椿園主事  
七十一使庫車作遐域瑣談紀新疆山川風土及外國  
事奇恣可喜王東田通副爲作比部二談歌當時秋曹  
人才之盛甲於諸部如伊雲林查蘭圃李雲莊祖舫齋  
錢南園許秋岩馮玉圃楊六士孫淵如言皋雲方茶山



朱滄眉魏春松馬秋藥胡果泉伊墨卿田鐵舟李石農  
馮魚山皆雲司勝侶也姚惜抱稱東田在刑部總辦秋  
審所建議皆當理舊制自九月至十一月以次奏上諸  
囚名冊請勾在直省者曰秋審四川司主之在京者曰  
朝審廣西司主之雍正十三年始設總辦秋審處各省  
軍流等案萃于浙江司歲終彙奏之罰緩者第其情之  
輕重以聞名曰贖罪處避員掌焉鄉會分校與閱秋審  
俱用藍筆東田贈周載軒句云一種藍毫分兩事此心  
同處在持平

厚庵侍郎阿克當阿先世以篤行著聞鄉里稱爲劉善

人家厚庵遺腹生太夫人織履以給且養且教既長補  
官學生考選筆帖式稍遷內務府郎中嘗扈從木蘭  
高宗見其容止問爲何人子曰臣未生而父已先歿問  
何以成立曰賴母氏之教詔旌門焉嘉慶十三年以護  
軍統領巡鹽兩淮者十二年入貳夏官道光紀元擢馬  
蘭鎮總兵不由科第而愛士好施見夏寶晉文昌樓賦  
爲賞入太學遂領鄉薦所以周給者甚厚寶晉字慈仲  
郭頻伽壻林族邨題其冬生草堂集云早是扁舟載酒  
時壻鄉煙柳碧絲絲西江初祖成圖派螳穴蜂房許論  
詩厚庵旣歿爲作劉公碑亦有槩度

梧門祭酒有京師冬日八詠曰鑿冰採煤燒坑黏窗調  
粥醃菜薰花夢樹夢樹移樹也樹經冬如睡移種易活  
冬至後移樹雖長尋丈者皆可活夢樹堂花可舉以爲  
偶昔李西涯從王宣溪乞竹栽沈石田爲畫移竹詩卷  
吳匏庵竹醉日題此卷云今朝竹醉教移竹荷鍤穿雲  
去路賒卻笑此君多潦倒醒來已在別人家此卷爲蘇  
齋所得題長句及七絕四首有云醉能付託李長沙鳳  
律誰銘蔡少霞莫信匏庵嘲笑語醒來不是別人家皆  
見風趣若夫陵谷依然世已移舉世俱在醉夢中奚翅  
草木之無知耶

粵本無雪漢議郎楊孚移嵩山松柏徧植珠江南岸始  
有雪巢其顛番禺潘毅堂舍人集名南雪巢其河南雜  
詩楊子宅邊松柏盡居人猶自說河南誰稽嶺外來巢  
雪重憶嵩陽萬木參所居卽孚宅遺趾擅園林之勝有  
句云半郭半郊供臥隱藕塘三月鷓鴣飛從子伯臨比  
部亦工詩寒暑表云琥珀乃拾芥磁石信引鐵物彙習  
所感妙理不容揭知風鵲有巢識水獺則穴晴雨占礎  
潤豐歉驗磨掣靈蠹歸鼓盞造化偶宣洩胡以人力巧  
竟與天工埒昔鍼直指南今表曲應節迎寒幽詩吹逆  
暑土鼓設春氣噓清和秋陽蓄煩熱四序頻推遷一日

亦更迭製作圓其筒琉璃光以徹旁本鏤分刻底壺聚  
芳烈中貫以銀汞或紅如雌蜺下上視寒暄銖黍不侵  
軼冰天炙爐炭暑月沃清冽沸如涌沃泉茶若銷春雪  
移置復其所俄頃守故轍氣候測蠡管天行肅圭臬輪  
扇氣自動葭灰制相列願持獻明堂此事關調燮

雍正閒宜興邵孝子志珪爲父割股嘗糞父歿廬墓墓  
生竹有光久之寂然唐陶山令荆溪修邑志將表孝子  
墓竹復有光如初吳槎客撰夜明竹記屬仁和邵右庵  
書于冊右庵有詩紀其事吳江譚辰山廣文夜光竹詩  
序云開建流人樵得竹根其夜熠熠有光名之曰夜光

竹則自有此種如四照木之類初不關孝感所致

烏程陳无軒廣文嗜古博物收藏書畫甚富錄所見名蹟爲湘管齋寓賞編宋芝山爲寫湘管齋圖陳惺齋題詩有斷絹殘縑細討論風流退谷與江村之句嘗手纂湖州詩錄但無小傳王松厓欲補爲之亦未成同邑劉疏雨明經桐亦精鑒賞積書至十餘萬卷竹汀蕙圃時相往復張秋水爲作眠琴山館藏書目序詩如幽居云焚香得自適鍵戶若爲親獨恨無山看還欣有竹鄰未霜憐病葉苦雨斷來賓不改貧居樂端如古逸民秋水謂其初學鍾譚爲題楚游草有不向嶽歸堂下過那教

分得竟陵燈之句性好賓客王鄂舟過疏雨書齋云衝  
凍徑來謀社酒討春先喜見堂花

管緘若題徐尙之書受詩卷云先人遺集各清敦霧夕  
同游沈范門緘若曾祖青邨比部詩與尙之曾祖茶坪  
詩同列漫堂十五子中也茶坪康熙庚辰進士不就選  
人東坡乞居常州卒於孫氏寓館去其家不數十武嘗  
以七月廿八日邀同學諸子肇祀先生用眉山二字成  
詩二章云鍛羽難遷月下枝文殊問疾信支離夢縈竹  
屋風前樹心繞觚稜雨後葵已分孤臣傷骨鯁可禁眾  
女嫉蛾眉憐才只有宣仁語千載追尋五夜悲白雲深

處碧波環詩■無端落此閒回首古橋衰柳斷傷心小  
院野花殷魂歸月黑疑儻耳鶻沒天低憶故山直接岷  
江溪水是瓣香裊裊淚潺潺時歲辛巳距建中靖國東  
坡騎箕之辰六百年也尙之其曾孫詩入吳會英才集  
以紀茶星薦充四庫館祕校議敘州倅歷宰南台其廣  
濟橋訪謝茂秦故居不得云斯人高臥久榛墟誰復能  
來式故廬史論抑揚存節概聲華標榜自乘除才非勁  
敵輸蘇李事已凶終悔耳餘爾日升沈何足恨不應重  
廣絕交書徐文長謂以軒冕壓布衣王漁洋則云王李  
詩實勝尙之自謂此詩實持其平王耘劬謂茶坪詩爲



晚唐風韻尙之句如野蘆行處台山翠坐來深故國音  
書憑斷雁壯年心事慨登樓自是學人家法

儀徵汪文舟孝廉示子詩數卷寒家萬石儲況經手澤  
重璠璣無多一語頻相屬是好兒孫不賣書語至真摯  
舒伯魯綠猗軒書目序云購書不難藏之爲難藏之亦  
不難讀之爲難是書也吾數年得之吾能數年讀之哉  
侈其心以游於汗漫無涯之區而卒不能一得者此高  
才之失而學者之通患也意尤完足

中江孟鷺洲比部爲朱南厓相國所得士有松雲歸隱  
圖相國題云四十五春桃李舊同林十株三翹秀方伯

司空相繼摧歲寒誰比喬柯壽嗟君本是梓州材百圍  
橙木中江栽鸞鳳棲枝香葉老鶴鴻顧影桑榆回巫山  
高高插井絡燕雲飄渺歸翎弱遲君暫作十日留送君  
聊進千鍾酌浮名去水東滔滔黃花晚節韓與陶田園  
不減畫錦樂廷平自覺于門高吾衰甚矣足窘步夢游  
猶識雲中路豁眸一笑君歸歟指點蒼霞翠微處阮芸  
臺同作云益部秋風足耆舊文梓參天紫芝秀吾師門  
牆才藝多亭疑誰似張蒼壽先生本是大雅材金門射  
策紅杏栽南閩執法冬雪冷公羊決獄春風回一朝懸  
車脫羈絡蒲薦車輪犢羸弱道旁觀者歎二疏帳祖公

卿滿螺酌鷺濤浙水流滔滔飄然顧我舒鬱陶觚稜回  
首郭門遠鄉雲掀眼瞿塘高 聖朝刑措德車步華平  
朝長峽中路文翁禮殿試重開他日相思暮雲處咸豐  
中鷺洲孫官祁陽尉楊伯飛用韻題句有云我滯官符  
歲月滔如椎鈍士問梅陶風流忽念何與李荒雲斷石  
孤雲高謂何蓉生李夢蓮皆中江詩人與楊交契化去  
已久也

瑤華道人字恕齋樂閒安福齋其藏畫處也所藏煮石  
山農墨梅小卷重其品寶惜在松雪翁如隱居士諸家  
之上嘗繪丹林雲瀑圖水閣臨溪大石如墮丹楓綠樹

相閒成林再上高峰如削流水如練極幽積之致王孫  
胸次固自不凡鄭邸惠園主人博雅好古收藏名蹟處  
曰雛鳳樓所藏衛賢盤車圖米數文自敘卷最爲甲觀  
乾隆戊子質郡王倩錫山華慶冠吉厓寫照自爲補圖  
題曰聽秋句山太僕題句謂宋王駙馬愛畫寒林秋水  
米老謂卽此見其貴而不驕況出自 帝子乎 皇八  
子爲成哲親王畫寒江獨釣圖天潢題者五人成邸自  
題四絕句成邸亦嘗作醉雪圖贈湯萼南讀學至紫瓊  
道人詩畫尤爲名家陶鳧鄉謂郡王身處宗藩心耽翰  
墨天懷高朗一邱一壑雅有勝情尤妙在層層皴擦透

入單微自然深厚其品詣從荆關馬夏損益而成不僅  
取法元四家也其仿黃鶴山樵松溪消夏圖松陰百尺  
小亭翼然礪曲山深茅齋共話均嘗於陶齋座上見之  
嘉慶時朱邸以樂雲主人汲修主人最負時名樂雲馭  
下寬失察家人比匪致褫爵習拳嗜酒與客飲夜以繼  
日醉後輒至敵人汲修喜度曲坐凌辱家奴失爵終於  
宗人府主事年五十四卒晚近諸邸亦有頗通賓客矜  
賞鑑爲名高者光緒甲午乙未閒某邸有十子之目新  
法旣行益多招致時髦坐作聲價鬪狗沐猴之流因相  
率緣以爲奸則便辟多而直諒少也

淇北江贈趙渭川詩爾來十載官長安君行入關我出關終南太華昔頻歷所恨背我游梁山渭川宰永壽延冀東王半庵修縣志其梁山詩注謂梁山自邠州大峪西北迤邐數百里由永壽之上宜里順循好時河西南入渭與乾武岐扶交界後人未歷其地多臆斷五經考辨梁山有二詩奕鄭箋云梁山於韓國之山最爲高大爲國之鎮所望祀焉在馮翊夏陽西北此指韓城郃陽兩縣界之梁山也書禹貢鄭注云岐山在右扶風美陽西北梁山西南此指乾州永壽之梁山也康成箋注原自畫然孔氏繇詩疏不達鄭意乃合而爲一云梁山橫

長其東當夏陽西北其西當岐山東南自幽遷岐當踰  
之殊不知岐周韓國東西相距五六百里古公率西水  
濟當由好時河西行爲是蓋梁山之下好時西遶武功  
入渭故耳其說得之自治可以破後人聚訟

韓是升東生爲補瓢明經次子能世其家學早謝場屋  
以桂舲司寇官曹郎就養入都禮恭親王延爲世子師  
頗優禮之汲修主人題其聽鐘樓詩稿云西山月落闌  
黎宮野納帶漏鳴霜鐘樂餘東老睡初足竹窗曉露煙  
濛濛吟筒詩卷謝塵俗塗抹新篇細披讀翠港新栽魚  
子袂綠雲高種桐孫竹布衣脫粟性所慣旨酒嘉肴非

所欲口留餘話無罣尤福防過分心常足

二語師  
篇中句

燕關

與海恣吟覽紫塞青山載歸麓天將美景付詩翁一身  
享盡清閒福詩不分唐與宋理不詮程與朱才人落筆  
寫江海高攀白傅兼髯蘇人間日用貴布粟胸懷吐露  
非豪麤君不見電光石火真俄頃浮世榮名同泡影莫  
待晨鐘百八叩銅魚始向華胥發深省樂餘東老者東  
生自號吳曇繡爲題畊饁圖云北郭瀟瀟竹樹居萁芽  
滿地水充渠尙書長物無多耳付與孫曾一柄鋤謂其  
從祖文懿公也司寇弟崇履卿嘗刻其族祖韓洽君望  
詩洽號寄庵易代之際屏居羊山妻死不娶未嘗數至



城市湯潛庵以求見不得爲恨其詩憔悴婉篤明詩綜  
推爲崇禎時吳人之冠至是刊而流傳朱西生序謂自  
來貞儒介士潛居山澤遭世多故發爲謳吟寓其故國  
舊君之感所在而有非有所怨誹譏訕義之所在不自  
知其所以然也幸際寬大之朝崇尚風節勝國諸遺民  
詩文集次第流播且有登之四庫者卽當日號爲殷頑  
誅夷殄滅日久論定而予祠予諡不沒其移山填海之  
思如先生之遯世无悶其詩又何所嫌忌云云語極得  
體補瓢存稿有寄庵公小傳

趙城籍班祿工火畫深淺陰陽毫釐可辨山水人物翎

毛花卉俱有生氣老而益工何蘭士嘗爲作羅雲山人  
火畫歌

鎮洋畢耀曾亮夫爲秋帆尙書從子己亥江南鄉試吾

鄉黃端人明府楷力薦未售有廣堪齋詩一卷和洪稚

存常博寒食憶舊游詩有云崇效禪林載酒行山僧肅

客笑相迎一堂風雅論詩久小立閒庭待月明謂博西

齋太史也入河南境口占云斗米聞過八百錢求工無

計最堪憐荒村一片斜陽影不是清明亦禁煙時爲乾

隆乙巳衛輝各屬連年被旱秋帆方調撫河南侍行而

作

翁覃溪送王石臞庶常詩南閣經傳到楚金寂寥千載  
寡追尋從今誇向山中客識字人原在翰林經學詞章  
本一途悠悠滂喜要人扶山居製得三倉賦方識洪家  
急就麤石臞少爲攷訂聲音文字訓詁之學吟詠迺其  
餘事閒爲里郇詩友涉筆道光甲午午子敬之刻其丁亥  
詩鈔一卷蓋二十四歲時作也多五言往體通籍後輟  
不復爲所倡和則任子田侍御及任三石農旣饒興象  
兼復故實非但以學爲詩篇什不多彌堪寶貴汎舟至  
芙蓉館云出郭眄平阡臨流泛虛艇空天如鏡浮倒景  
牽游苻孤館面迴汀地僻風日冷一水共蒼茫蒲稗相

與永菡蒼華猶敷伊人躅何迴鴻寶今琳瑯仲蔚甘幽  
屏伫立無一言斜陽對孤景芙蓉館宗子相讀書處也  
程公說宋寧宗時人所撰春秋分記以史記法取左傳  
事釐爲年表世譜名譜又爲歷書天文五行諸書又分  
記周天王內魯外諸侯以及次國小國四夷之事條分  
縷析事因左氏義本聖經皆首記天王以見天下之一  
乎周分記諸國以見列國之所以異詳見公說自序其  
弟公許於乾祐三年刻梓乾隆乙未御書題宋槧春  
秋分記五律一首顧震滄撰春秋大事表時未得見此  
書也

純廟有摹李廸雞雛待飼圖題云待飼摹李畫吾心重  
念之設如歉歲值誰拯吾民飢獨我誠深懼諸臣願共  
思子輿舉稷語應各慎攸司偶詠宋人名流集藻畫冊  
中李廸雞雛待飼圖惻然有懷于災壤飢民之無數也  
因摹其畫卽用題廸畫韻成什命勒石以示爲民父母  
之官題李詩並書于左雙雞如仰望其母竟何之未能  
率場啄誰憐空腹飢展圖一絜矩觸目切深思災壤民  
待哺嗷哉羣有司 列聖多能天縱祕殿珠琳石渠寶  
笈三編內載 世祖宸翰十六件 聖祖宸翰一百六  
十件 世宗宸翰十五件 高宗宸翰至八十件乾隆

辛亥 御製王穀祥春雛得飼圖詩注予向曾摹宋李  
迪雛雛待飼圖并題句以喻政在養民誠當保赤因鐫  
石頒賜用勛司牧之吏茲覽王穀祥此圖老雀歸飛含  
蟲欲飼雛者色喜迎承恐後一段殷情神貌欲活與李  
迪待飼之意同而予絜矩之志觸目卽厯民艱雖新正  
下詔展賑加恩行之五十餘年猶未能戶慶盈寧水旱  
常有彼向隅者豈盡免枵腹之歎哉仍命摹泐以示良  
有司俾各發天良勉與我共治者入徵耄念雖幾暇游  
藝之餘未嘗一刻忘在宥也宋儒黃勉齋謂邑民猶雞  
雛令其母也聖賢愛民後先一揆

唐子畏溪山八景冊曰蕉窗道話曰武陵桃浪曰江山  
漁隱曰懸崖噴瀑曰楓林坐愛曰水邊吟興曰萬木號  
風曰柳州詩意 純廟題詩謂冊中題者自陳元龍以  
下八人皆康熙年間內廷翰林對景拈毫各乘興會獨  
薄海所題宿雨初收曉煙未泮云云乃直寫董其昌語  
以當題識彼文筆故不如上諸人所謂欲蓋彌彰也因  
有薄家獨藉董家題之句又干葉蓮本放漢種 聖祖  
命移植山莊壬寅七月蔣南沙奉詔繪圖時內廷翰林  
題詩者張廷玉勵廷儀張照陳邦彥王圖炳汪應銓薄  
海 純廟謂七詞臣題詠惟薄海詞氣不相聯屬知其

夙失學必有藍本竊取因命內廷翰林檢閱舊作果得  
明顧璘題許彥明白蓮詩范成大詠郡沼雙蓮圖詩薄  
海乃剽竊舊句節去二字連綴成篇云云 天鑒不爽  
如此

乾隆丙午題郎世寧繪準噶爾獻馬圖詩注云噶爾丹  
策楞所貢馬其一純白有青文高八尺長丈有二尺賜  
名如意驄命西洋人郎世寧繪圖內廷翰林爲之序讚  
沈德潛題什茲偶加披閱所有題識之梁詩正汪由敦  
蔣溥莊有恭張若澄沈德潛等六人皆已凋謝又爾時  
待御之臣圖其貌者來保傅恆羅卜藏汪札爾海蘭特



庫博爾奔察雲寶五十七等九人今乃無一人矣爲之  
悵然余以四十年後重題是圖而序讚侍御諸臣惟嵇  
璜一人在因命再與賡和是什 聖懷念舊時見篇章  
棄帷疲馬皆垂惠而不見遺意至遠矣

江陰周伯高陽羨茗壺系龔春一名供春吳學憲頤山  
之青衣也頤山讀書金沙寺中供春于給役之下竊仿  
老僧心匠淘細土搏胚茶匙穴中指掠內外指上羅紋  
隱起可按胎必屢按故腹半尙現節湊視以辨真今傳  
世者栗色闇闇如古金鐵敦龐周正允稱神明垂則矣  
金沙老僧者逸其名聞之陶家云僧閒靜有致習與陶

缸甕者處搏其細土加以澄練捏築爲胎規而圓之剗  
使中空附陶穴燒成人遂傳寶董翰趙梁玄錫時朋卽  
大彬之父是爲四大家據聞四家俱供春之弟子云私淑  
弟子則有王南林陳若水亦有名詹石琴龔壺天香詞  
武火騰窑辰砂搗月光含罨畫溪水拊手難留瑩眸逾  
淨滑膩女兒膚細湯傾蠓眼驗隱隱羅紋微起栗色時  
家舊仿茶經陸家添記龍團夢回自試颺簾衣素瓷烏  
几攜去荷深池館竹涼秋寺幾點松花豆碧比黃錫張  
銅更精緻舌本甘回摩挲款識亦茶煙閣外之雅製也  
陶肆謠云壺家妙手稱三大謂時大彬及李大仲芳徐

大友泉張叔未嘗得時大彬方壺於隱泉王氏其弟季  
勤藏壺二一陳明遠製底鐫石乳泛輕花一方壺底陽  
文石林中人四篆字係天啟時吳萬化物後來曼生壺  
以銘詞勝

吳門葉樹藩海錄軒所刻文選爲朱子予纂校陳惺齋  
輓子培句云一編文選在著作免終涇

洪北江跋吳二安青山門雜詩稱爲里中耆宿二安名  
一諤湯湖弟子員爲詩力求澹澀一詩或苦吟至四五  
日脫稿後不當意復棄去自定晚學軒稿近三百首所  
居曰橫溝距常州郡城四十餘里去李中耆家纔數里

過從爲密有所作輒以示申耆劉醋甫見其詩曰此大  
似陋軒集二安聞之急從申耆索吳野人詩讀之既而  
大喜曰誠然誠然飄蕩吟重悼亡兒辰云飄蕩成吾老  
傷哉愧父爲貧無恩到汝死且責歸誰家室謀終負門  
閭歎在斯夜臺猶子母豈見淚如絲同邑邵芳原布衣  
榮貧而嗜吟與二安友善志致相似居陳渡橋東曰陳  
渡草堂自署聯云原我疏狂多在酒幸人非笑卻于詩  
消夏偶成云綠陰低亞坐風絲三四鄰翁說幼時飽飯  
一犁梅雨足不知城府有官司其爲人可想也二安雜  
謠云烏巢返哺母慈子孝弋人穿林捨其虎豹羊蒙虎

皮驚走其羣俄還本質反視而嗔游子違親輕言絕裾  
寡婦欲嫁念子躊躇頗有古意

常熟翁玉于先生長庸順治丁亥進士累官布政司參  
議以清節著游粵與陳元孝梁藥亭唱酬甚歡從子鐵  
庵司寇少時貧甚先生周之助其成立五世孫潛虛學  
正咸封官海州日唐陶山方知州事極引重之其瓶花  
歎云灼灼瓶中花可憐顏色好色好已離根芳菲豈常  
保意戒無本之學也子卽二銘相國孫瓶笙師一門兩  
世俱入綸扉戊戌罷官歸里以甲辰五月身故宣統紀  
元補謚文恭端忠敏所奏請也其詞云翁同龢以甘盤

舊學我 穆宗毅皇帝恩禮倍至我 德宗景皇帝眷  
顧尤隆當甲午戊戌之交時局艱危 宮廷旰食翁同  
龢身膺樞要責有攸歸在當時不可寬責備之文在今  
日似宜有原情之論我 朝厚澤深仁最隆師傅同光  
兩朝之 聖學旣已垂耀千秋 經筵啟沃之世臣或  
當掩其一眚我 皇上繼志述事至孝至仁上體在天  
降鑒之心定深故舊不遺之感仰懇開復原官以昭恩  
意可否特予優卹出自聖裁云云師王子鄉舉二十七  
名余乙酉出公門持卷示潘鄭庵師互相贊歎謂於馬  
鄭古誼如肉貫鼎必漢軍老宿無疑及唱名乃知爲弱

冠少年名次實符期傳衣鉢通籍後文勤師及孫子授  
先生頻舉當時情事以爲言蓋瓶笙師出闈卽以語內  
廷諸老也深愧學行無所底殊負好古積學之褒獎師  
旣枋國蹤跡甚疏卽今乃悔壯時之迂嬾矣

竹巖大使明新鐵巖孝廉明華漢軍姚氏昆弟皆能詩  
竹巖句如多病怕逢新令節早寒初著舊棉衣鐵巖句  
如空腸得月生芒角交友因人判淺深爲袁存齋陳古  
漁所稱鐵巖舟中與春巖兄夜話云邗江花柳送春歸  
雁影翩翩喜共飛潮落岸沙人語亂夜涼逢背雨聲微  
壯心已覺因年減折節方知任俠非從此閉門惟讀易

物情回首庶知幾頗饒情韵鐵巖庚子舉于鄉先曾叔  
祖同年也同榜如吉瑞小山侯岱毓芝亭慶雲保玉音  
皆耽吟事玉音有所懷云著書日寂寂荒徑有閒門壁  
少新詩句衣多舊酒痕愁聽風淅瀝小倚月黃昏若是  
古人在此心應可論

梁溪周懷西以治行聞兩浙書景寧縣壁詩謂景邑多  
番民

番讀  
如蛇

相傳爲槃弧之後累世耕鑿不識字不徒業

不娶他族不出鄉土分四族曰藍雷吳鍾善治田隨山  
爲形擇其有土膏者誅茅剔石而耕治之環曲級累泉  
脈遠則刳竹爲溝遞接引雖隔岸可達男婦雜作所治



田皆納租於土人而已無寸壤故亦無賦役之事攷中國種族之殊異者所在多有寧古塔東北海島一帶卽唐書所云少海之北三面阻海人依島嶼散居有魚鹽之利其種有七曰鄂倫綽在近海之多羅河強黔山游牧曰奇楞在寧古塔東北二千餘里亨滾河等處曰庫野居東海島之雅丹達里堪等處曰費雅喀在松花江極東曰恰喀拉散處於渾春及富沁岳色等處曰七姓在三姓之西烏扎拉洪科等處曰赫哲所居與烏扎拉洪科相接器用語言各以其地爲別然皆以漁獵爲生冬衣獸皮夏衣魚皮略相同也甘肅河州所屬番民爲

種四洮州五岷州四莊浪三狄道武威古浪永昌擺羊  
戍通判大通衛歸德所肅州文縣各一西寧二碾伯三  
高臺三四川松潘鎮南屬番民爲種九威茂協六彰臘  
營三建昌鎮二會川營三泰寧協五阜和營十兒那達  
龍安營石泉縣平番營各一貴州定番州八各番大率  
古氏羌戎種設土司土長管轄苗民則湖南有青紅二  
種廣西則有龍勝羅城懷遠三種四川則有九姓苗雲  
南則有曲靖等處花苗貴州則有花紅黑白青東西濃  
天蔡家宋家龍家狝家馬燈龍家九股平伐補籠谷蘭  
羅漢紫薑楊保狻獠牯羊等苗二十三種其別苗而稱

蠻者雲南則有羅婺窩泥苦窗撲喇撒彌獾獾摩察扯  
蘇姆雞麼些峩昌麥盃媪且利米普盃凡十五種貴州  
則貴定都勻等處大率依止山箐或雜齊民兼轄土流  
卽地安插獠人一名獠獠今楚粵黔山谷間有之獠人  
性尤獷悍廣東在靈山境內廣西在興安賀縣融縣貴  
州在荔波濃人則散居思恩田州廣南伶人則在廣東  
之懷遠猺獠在四川者本邛部地在貴州者漢濟火之  
後獠獠唐時隸東西兩爨部落亦以黑白分貴賤狃狃  
凡九種多在黔中其以民稱者福建羅源古田之畚民  
廣東合浦之山民以人稱者湖南永順保靖之土人廣

東瓊州之黎人廣西岑溪貴縣之猥人馬平之獠人西  
林之血人狹人太平西隆之土人甘肅洺州之二種土  
人四川會川營之夔人雲南之白人狃人沙人蒲人怒  
人猿人莽人縹人貴州之夔人洞人土人不下數十種  
其聚落之大者設宣慰安撫土司統之而仍轄於曷吏  
改土歸流及散處於各地者則設土官分理亦卽隸於  
官司歲以銀穀爲輸將以物產充賦貢亦有讀書列膠  
庠者蓋威德之所被然也

閩中月令多早以漳泉爲最明人詩有麥收正月盡茶  
摘上元前之句龍巖稍次之亦不出二月盡已嘗新麥

徧插稻秧蘇詩浮石已乾霜後水焦炕閒試雨前茶胡  
悌詩玉髓新烹穀雨茶 高宗辛亥烹雨前茶詩注謂  
雨前茶祇聞爲穀雨不聞爲雨水許次紆茶疏清明穀  
雨摘茶之候清明太早立夏太遲穀雨前後其時適中  
學林新編茶之佳者造在社前其次火前亦不言早至  
雨水前進貢雨前茶於二月初已到計其摘製時當在  
雨水之前因憶聶夷中二月賣新絲五月賣新穀之句  
爲之心惻云云 聖心愛惜物力然南方氣候特早雨  
水前茶古自有之趙鹿泉漳南上巳詩風光登麥後韻  
事秉簡辰闌中嘗於秋分後海棠盛開入冬未已九月

中梅花梔子並放亦中土所無

故事吏部選郎缺擇人視他曹尤慎吏部不得人則調於他曹郎中福清何念修少宰出戶部員外授選郎前此所未有也轉御史典選如故出爲江西鹽驛道自湖南按察使罷歸特諭仍掌選曹事未幾拜刑部右侍郎旋調本部由主事六年遂貳銓政其堂廳藤花句云曾從粉署爲郎日看到冰廳啟事時涂蕤溪所謂超拜殊恩自省郎是已前此官吏部有聲者南昌劉清翬吳龍以雍正癸卯庶常由朱文端奏薦改擢選司與桂林相國同事嘗語文恭曰凡事視情理何如情理當則體例

自合不爾一胥吏優爲之寧須吾儕耶銓注條規繁重  
選人冗雜胥吏巧猾多端鉤弊釐竅洞中窾要每遇疑  
難膠葛爲折衷一二語無不帖服文端及張文和先後  
管冢宰事俱倚如左右手游歷臺垣仍兼吏部事如故  
後此則李雨村亦有可稱者乾隆丁酉湖北監利縣典  
史缺出某隨楚藩留川雨村以其現係辦公例應先補  
因與同司兩議將已畫押銷去部臣劾其浮躁附入京  
祭引見時特旨詢問仍復原官自通潞歸田後與沈雲  
椒書謂今之名士有所謂二吳二李者位躋九卿其趨  
附何人不敢知然不知果能卓然自立否二李吾未識

二吳則固我與君同年君當規之勿避數疏之嫌吳謂  
白華兄弟李謂鍾祥李雲門侍郎其意以和士開比和  
相而以盧思道望見二陸兩潘森然與槐柳齊列喻白  
華諸人也答姚姬傳書自謂與宰相爲忤寧甘廢棄文  
雖不工意自可取嘉慶初元朱文正曾面請於 睿廟  
謂近日士習頗尙奔競前詹事錢大昕侍講梁同書郎  
中姚鼐皆以文受知 先帝梁又宰相子並能辭榮退  
居以文行式其鄉請與加銜以風示儒林尙廉讓抑澆  
俗知君相之所以挽回風氣之有道矣因雨村語特並  
識於此



王子完顏和庵宗伯以祭酒主順天試辛亥九月廷試  
卿僚列第一入直南齋其序吳壽庭霽春堂集比之玉  
溪兄弟花萼甲乙之編謂壽庭與其兄曇繡俱有集也  
和庵與曇繡嘗同官粵東曇繡任粵臬借贓罰爲名收  
受陋規升任東藩起程時又派此項作路費和庵以粵  
撫密查覆奏論如律其秉正亦有足稱者曇繡癸卯典  
滇試丙午復視學其地所著榮性堂集滇黔詩較多令  
子巢松學士九齡卽隨侍於滇嘗同林文忠典試雲南  
文忠贈詩有云遺篇細檢驂鸞錄佳話曾描對鯉圖  
蘆溝橋北二十里長楊店官柳沿途右望西山廣袤如

畫南海顏穀田常博庚戌與張墨池孝廉在此評論畫  
理穀田詩云凌晨走長坂平野瀉繁縟柳色濃淡姿迎  
風弄晴旭林遠樹腳齊玲瓏異盤曲枝梢隱西山厯落  
幾閒屋我生嗜吟詠遇景輒揩目偶然悟畫意徘徊逐  
林麓知君善臨池揮灑脫塵俗京邸兩歲淹眞蹟快展  
讀雅懷託豪素未使前哲獨歸造粒粟園吟詩倚修竹  
相期一斗墨贈我千里綠墨池歸作長楊野店圖贈之  
余在都日每歲清明上冢輒吟是詩癸卯返里赴良鄉  
丙舍一過此地忽忽十五年歸期未卜也

仁利孫景高明經仰曾應詔進書曾邀宸翰嘗於西吳

故家購得瀋化閣帖石洗剔椎拓梁山舟謂與所見舊  
拓閣帖工有銀錠櫃紋相傳爲賈相門客從賜本摹出  
者絕類凡字迹波磔石片剝蝕之處無毫髮差因定爲  
宋刻原石景高顏其山莊曰寶石劫後莊毀石存己亥  
庚子閒在杭其裔孫曾以拓本見詒景高詠屋旁銀杏  
詩攜書讀根下撫之助吟哦紛紛黃雪落待校丹黃訛  
壽松堂藏書甚富金石書畫多加考證非繁華鄙夫比  
也

婺源胡黃海明經題畫詩千章如幄綠初齊複水重山  
路易迷踏向碧雲堆裏夫歸來須記小橋西姚姬川評

其瓿餘詩鈔獨取此廿八字自謂才小者之嗜好如此  
鉛山蔣師退謂集中此詩另爲一格何啻西域胡能見  
海底寶

甘道淵贈李艾塘句云擊筑夜歌燕市月騎驢春看剡  
門山艾塘兩至京師三游嶺表撰有工程營造錄孫季  
述歎爲奇書前此萬厯閒松陵計成字無否刻園冶一  
書較訂成做未按則例李漁笠翁刻閒情偶寄悉仿園  
冶其書旣非一手又未按工部則例也季述序艾塘詩  
謂揚州流寓之以詩名者曰鄭板橋金壽門二君稱意  
爲詩特好爲奇怪字畫一時爭購其筆跡而羅兩峰善

畫山水樓臺得宋人法恐不見重於世因畫鬼以抒其  
喜笑怒罵之旨艾塘無是故知者少亦如悃悞無華之  
吏不如變亂舊章者之巧於取名其言深切世法

自來詠王彥章事無貶詞歐陽礪東社集一首獨抒異  
論錄之以警甘爲賊用者詩云生子當如李亞次老賊  
心驚葬無地壽昌逆黨何物奴妄希一死留名字吁嗟  
永叔稱良史書法乖張乃如此賊爲賊死何足矜正似  
烏虻遭屠耳廉丹猶以赤眉誅何況唐非赤眉比乃知  
天道亦禍淫予奪未盡違人心君不見中都一戰賊臣  
死鬪雞小兒作天子

高恪勤以指法鳴天下文孫蒼崖少府能演其傳客慶  
蕉園粵西幕中嘗爲蕉園作覓音圖梅花風雪中衫笠  
騎驢二童挈琴酒隨後蓋溯洄伊人意也歐陽礪東時  
同在節幕爲蒼崖賦恪勤金篦工筆碧城圖云樊桐一  
片雲化作金世界誰言秋毫端中有光明在蛟胎蹙霜  
紋古墨出光怪精爽動冥漠一髮引千態恪勤昔擅名  
指法立宗派何知矜愼意故自守前輩孫枝亦秀出落  
落與時背邂逅嶺南道日夕接清話神仙不可期淨境  
在宇內披圖撫靈蹤因之寄遙嘅

礪東論詩謂唐人惟玉谿生善言情尤善使事世人譏

其獯祭乃指其文非詩也韋慎旃詩千秋若欲求詩史  
合把西郊配北征楊翠巖謂玉溪生近體詩與山谷古  
風異貌同妍均是義山知己

明夏正夫劉欽謨同在南曹有詩名劉差勝每見卷中  
有劉詩累月不下筆燕都之會李于鱗詩必晚出見他  
人有工者輒廢已作法時帆序王東田雙佩齋詩著此  
語謂余見葑亭詩累月不下筆輒廢已作不知凡幾矣  
袁簡齋暮年積放下筆不檢葑亭作書規之簡齋書來  
辨議而改竄者亦不少吳蘭雪與葑亭論詩輒主三成  
之說謂必成句成章然後可以成家否則才軼於法理

空於詞雖有性靈終歸湮沒亦有見於客氣易盡求一章一句之傳不可得也張瘦銅與葑亭善瘦銅每曰詩不可自欺有一字未愜便放過是自欺也葑亭曰詩不可欺人中無所得高談王孟韋柳謂可空一切是欺人也葑亭詩多新警句如雙樹隨僧老孤峰對佛尊新月淡偎樹遠天青墮江泉深皆著月竹密自成雲得月江逾大無風山自寒溼雲破處月當戶疏露滴時風過花水多於地常通約山嬾如人不下樓鐘聲出寺知風便樹影移船見月升未三五里輒逢渡纔八九家知是邨天空雨點有時作風定花香無意來萬松蔽日初無路



一杖穿雲忽有僧屋因小漏留書法花爲新移示病容  
皆所謂眞想在襟倜然自遠仲子香圃明經麟生亦嘗  
問字於時帆詩如落霞浸水有餘色遠樹過蟬時一聲  
雅有父風痼疾早逝病中書懷有云自信並非今世業  
可堪纔作少年人姚惜抱嘗爲陳石士誦其句而悲之  
季子竹嶼都轉鳳生初以通判官浙江奉檄查勘水道  
探明沈啓吳江水考張國維吳中水利全書 國朝金  
友理太湖備考及各志證以當時形勢溯源于天目竟  
委于吳淞成浙西水利備考一書極爲精審

右安門外尺五圍金可亭尚書簡別墅也初爲王氏園

都人多於此納涼後分鬻於多氏轉爲陝臬特通阿所  
有公子於此營窀穸焉陳受笙詩茨菇葉爛野亭秋一  
箇糟牀臥斷流聞道游人多避冷蘆花風起酒帘收休  
寧戴延祚竹友詩彙曲闌千金粉積風亭月榭儘徘徊  
尙餘幾箇華堂燕冷煞斜陽盼不來黃霽青城南紀游  
詩云有園金碧出水次游人還說司空家可亭高麗人  
隸滿洲謚勤恪聚珍板其所造也鑄木單字凡二十五  
萬餘

曾賓谷贈章實齋國博詩章公得天秉羸紕迴殊眾豈  
乏美好人此中或空洞君貌頗不揚往往遭俗弄王氏

鼻獨臙許丞聽何重話仿仲車畫書如洛下諷又嘗患  
頭風無檄堪愈痛況乃面有癥誰將玉璣礪五官半虛  
設中宰獨妙用試以手爲口講學求折衷有如遇然明  
一語輒奇中古來記載家皮置可充棟歧路互出入亂  
絲鮮穿綜散然體例紛聚以是非訟孰持明月光一爲  
掃積霽賴君雅博辨書出世爭誦筆有雷霆聲旬旬止  
市鬩續鑑追溫公選文駁蕭統乃知貌取人山雞誤爲  
鳳武城非子羽誰與子游共感君惠然來公暇當過從  
謝蘊山懷人詩有耳聾揮牘易鼻堊運斤難之句實齋  
長於紀覽多異聞以文章識議激昂今古嘗謂同時博

雅諸君讀書如捧散錢奈無貫索何與王以除書謂儒者學識不廣囿於許鄭之說而以卑論仲任俯視子元自詡所撰和州志永清縣志當時服其簡核其尊人勵堂大令鑣壬戌進士宰應城有惠政嘗病唐宋野史小說傳記足軼正史而文多蕪漫因以意節之鈔江表志五國故事南唐馬書北夢瑣言凡十數種亦劬學之士也

周希圃寄姊婿陳同甫詩論詩酷比申韓律多難頻分  
管鮑金同甫名覺民湘陰人句如苦潦又逢騎月雨惜  
花愁見照泥星世業未離龜手藥雲林敢望鶴頭書俱

見細切

舒鐵雲尊人名翼官粵西永福丞所治鎮南關爲安南  
國往來孔道故事貢使至今延之關外得與其國之文  
人唱和鐵雲嘗從之出關賦銅柱詩爲安南使者攜還  
本國詩云日徼煩郵吏雲臺失畫工關中遲鄧禹牀下  
拜梁松豈有三遺矢曾經一挂弓可憐銅馬式何處寫  
如龍突兀三千仞摩挲五百年將軍功略地丞相樹參  
天華表疑歸鶴猿溪感視鳶六州誰鑄錯只有謗書傳  
宋茗香別鐵雲詩所謂銅柱詩傳天外使是已鐵雲與  
王仲瞿孫子瀟齊名法梧門作三君詠嘗從勒文襄戎

幕作諭苗砦文檄識土干總龍么妹之爲人黔中雜詩  
載其事其黔苗竹枝詩於風俗飲食衣服言之甚詳花  
壯節帥藤甲軍征青谿苗所向無敵旣而孤騎深入陣  
亡於落花坡鐵雲有落花坡弔花將軍詩福文襄薨於  
貝子厓亦地讖陳雲伯和鐵雲作有云嫖姚畫像麒麟  
閣更有紅山貝子厓然文襄驕貴敗壞風氣未可與壯  
節並論也

方子雲受詩法于袁存齋句如風急忽疑星欲墮舟移  
如與月同行柴門遮竹不知屋溪水通江自抱邨鐘來  
夕照明邊寺鳥入春煙淡處邨高閣紅扶臨澗樹小亭

青受隔江山急水與天爭入海亂雲隨日共沈山雲與  
亂鴉爭樹宿螢隨清磬出樓飛皆於晚唐爲近吳白庵  
與之善爲賦雙鶴篇時同客弇山幕

朱阿顛瀛洲將軍行云虎豹不噬人化爲豸與麟古來  
多義士慘屈誰爲倫海天多波濤奮鬣來長鯨觸之舟  
立破萬死無一生嗟哉亦赤子何竟甘沈淪始也飢與  
寒有隱不敢陳長吏又迫之漸與盜賊鄰旣也自救死  
遂作恩與循八閩兼百越海島空邏巡隨風靡定所偶  
犯吳淞濬大吏聞戒嚴羽檄頒徵兵徇令于軍中曰余  
國上卿亂民殺無赦坐使海甸清軍令重如山士卒皆

心傾瀛洲有將軍報國矢丹忱奮勇踏波濤雄劔腰閒  
鳴但知有俘馘違計功與名飛章上丹陛升擢旌其能  
功高眾咸忌變白來青蠅大吏不加察以賊爲良民亂  
民固無赦誣良罪亦均予爲國執法否則丞相嗔二千  
石以上曲意先承遵獄成坐棄市觀者盈千人嗚呼將  
軍妻陳詞多苦辛妾夫自束髮矢願致此身妾寧碎首  
死明夫非罪臣將軍有令子弱冠温且純躡踊呼蒼天  
有寃不能伸兒願侍父死躍身赴海濱是時海水立空  
際聞雷霆鱷鼉盡辟易海若來相迎願君爲鬼雄陰使  
盜賊平生前志未竟死後氣亦英爲君雪幽憤賦此瀛



洲行此爲楊游擊天相作大吏謂江督蘇凌阿丞相則  
和珅也阿顛名鑑字明涵長洲布衣有一拳石山房詩  
鈔子環之及子婦高均嫺吟事

吳澹川於嘉慶丙辰在襄陽戎幕寒食同陳明府華祝  
出城撫卹難民感賦云迷望風煙滿郭門回看花柳減  
春暄流民就給官倉粟殤祭都來寒食村失主田園經  
戰後傍人兒女總啼痕知君對此不忍去況其悽然逆  
旅魂藹然仁者之言其記順治中佟中丞國鼎撫閩延  
梅里李山顏掌書記有流民數千入福州境疑其寇也  
將盡寘諸法山顏力白其寃得釋其上中丞詩云妖人

布流言間左竊奸宄城南數千人如肉登諸几多公重  
干言救死罷遷徙義以制軍國仁以育赤子事亦可傳  
高宗嘗於趙北口張水嬉錢師曾詩憶昔巡方駐翠華  
逶迤行殿尙交花來時雲物縈僊仗去後煙波屬釣家  
菰熟秋深遲渚雁柳眠春曉有宮鴉川原清淑鄰畿甸  
太液蓬瀛好共誇瀛鄭交流積水鄉西通諸淀滙汪洋  
南垂北際山川古傳往輶來日月忙花外尙留風燕輒  
柳邊惟有夢鷗涼清芬近接韓嬰里定有詩人在一方  
潘四農趙北口詩居民猶憶宸襟暢畫鷁回環繞翠旂  
傀儡之戲不一有從上以長絲牽引者爲提偶有以板

託平移者爲推偶有置竿上自下持之運動者爲戳偶  
別有翦紙象形張隔素紙搬弄於後以觀其影者爲影  
戲常熟黃穎禪上舍曰下新謳云傀儡排場有數般居  
然優孟具衣冠絲牽板託竿頭戳弄影還從紙上看世  
有執大政負時名甘爲人所牽率而不辭者望之儼然  
何異於盤鈴之一物哉

雪橋詩話三集卷第八